

Bazar Ramadan: 60,650kg makanan, minuman bernilai RM724,770 diselamatkan

Oleh [Asrol Awang](#) - April 9, 2024 @ 2:01pm
bhnews@bh.com.my



(Gambar fail) Foto hiasan - FOTO BERNAMA

KUANTAN: Sejumlah 60,650 kilogram (kg) makanan dan minuman dianggarkan bernilai RM724,770 diselamatkan di 139 Bazar Ramadan seluruh negara melalui Program MySaveFood@Ramadan 2024.

Timbalan Menteri Perdagangan Dalam Negeri dan Kos Sara Hidup, Fuziah Salleh, ia berbanding 25,000kg makanan serta minuman dianggarkan bernilai RM300,000 diselamatkan di 55 Bazar Ramadan pada tahun lalu.

Beliau berkata, MySaveFood@Ramadan 2024 dilaksanakan sebagai inisiatif pengurusan sisa makanan di Bazar Ramadan secara berstrategi dalam usaha menyelamatkan lebih makanan dan minuman.

"Program MySaveFood@Ramadan 2024 adalah kesinambungan program yang dijalankan tahun lalu melalui kerjasama strategik Kementerian Perdagangan Dalam Negeri dan Kos Sara Hidup (KPDN) dengan Pertubuhan Pemuda GEMA Malaysia (Pemuda GEMA).

"Pembabitan lebih ramai sukarelawan dan Gerakan Pengguna Siswa (GPS) dari institusi pengajian tinggi awam serta swasta (IPTA/S) tahun ini menunjukkan perkembangan positif bahawa usaha ini akan lebih berjaya pada tahun akan datang.

"Ia adalah usaha murni barisan anak muda mengumpulkan makanan dan minuman yang masih berkeadaan baik serta tidak terjual di Bazar Ramadan tertentu sebelum mengagihkannya kepada pelajar, rumah kebajikan, gelandangan dan golongan yang memerlukan.

"Program itu yang dijalankan di 139 Bazar Ramadan tahun ini membabitkan 2,112 sukarelawan termasuk GPS, berbanding 500 sukarelawan tahun lalu," katanya dalam satu kenyataan, hari ini.

Melalui sistem pementoran oleh Pemuda GEMA, Fuziah berkata, pembabitan 31 cawangan GPS (21 IPTA dan 10 IPTS) dan jumlah sukarelawan tahun ini diharapkan dapat dipertingkatkan pada tahun akan datang.

"Pembudayaan serta pemikiran menolak pembaziran, dan pada masa sama menyuburkan nilai ihsan, merupakan antara objektif yang mampu dicapai dalam kalangan siswazah melalui program ini.

"KPDN akan terus menyokong usaha murni ini dan berharap ia menjadi satu budaya yang dipraktikkan dalam skala lebih besar pada tahun akan datang.

"Kejayaan program ini dilihat daripada jumlah pembaziran yang berjaya diselamatkan, serta pembabitan anak muda dalam gerakan sukarelawan yang dapat membentuk nilai ihsan masyarakat madani.

"KPDN turut mengalu-alukan badan korporat, badan bukan kerajaan (NGO) dan individu untuk berganding bahu dalam menjalankan program seumpamanya ke arah menerapkan nilai murni dalam masyarakat di negara ini," katanya.